

Evening Dogri (NSD) Bulletin 11-06-2024

आकाशवाणी

खास खबरां ...

- 1 नमें चनोए दे लगभग सारे मंत्रिणं अज्ज अपने औहदे दा कम्मकार सांभी लैता।
- 2 प्रधानमंत्री नरेन्द्र मोदी होरें आखेआ ऐ जे भारत दे लोक सदा रमानदारी, सुरक्षा ते तरक्की दी बत्तै पर अगड़े बधने दी सोच दे हिमायती रेह न।
- 3 प्रधानमंत्री नरेन्द्र मोदी होरें लोकें अगगे अपील कीती ऐ जे ओह योग गी अपने रोजमर्रा दे जीवनै दा हिस्सा बनान।
- 4 बीजेपी दे वरिष्ठ लीडर मोहन चरण माझी ओडिशा दे नमें मुख्यमंत्री होंगन, कनक वर्धन सिंह ते पार्वती परिदा होरें गी उपमुख्यमंत्री बनाया गेआ ऐ।
- 5 सुप्रीम कोर्ट नै नीट 2024 दे बाद मैडिकल कार्यक्रमें च दाखले लेई काउंसलिंग प्रक्रिया पर रोक लाने थमां इंकार करी दित्ता ऐ।
- 6 अफ्रीकी मुख्य मलवी च होए दे जहाज हादसे च उपराष्ट्रपति सौलोस चिलिमा ते 9 होर लोकें दी मौत।
- 7 समाजवादी पार्टी दे अध्यक्ष अखिलेश यादव मैनपुरी दी करहल विधानसभा सीट परा स्तीफा देइयै हुन सांसद दे रूपै च अपनी जिम्मेवारी निभागन।

<><><><><><>

Amit Shah Chsrge

केन्द्री मंत्री मंडल च शामिल कीते गेदे लगभग सब्बने मंत्रिणं अज्ज अपने अपने मंत्रालय दा कम्मकार सांभी लैता ऐ। अमित शाह होरें अज्ज गृहमंत्रालय च केन्द्री मंत्री दे तौर पर जिम्मेवारी संभाली लैती ऐ। उनें सहकारिता मंत्रालय दा प्रभार बी

सांभी लैता ऐ। अन्नपुर्णा देवी होरें महिला ते बाल विकास मंत्री दे तौर पर औहदा संभाली लैता ऐ।

<><><><><><>

Jatinder-Governance

केन्द्री मंत्री डॉ. जितेन्द्र सिंह होरें आखेआ ऐ जे पिछले इक दहाके थमां खरे शासन सरबंधी कीते जा करदे सुधार जारी रौहगन। एहदे कन्नै नागरिकें गी ध्यान च रक्खियै बनाए जाने आले सरिस्ते पर बाद्धा होग ते हर नागरिक लेई सखल्ले जीवन गी जकीनी बनाना जाई सकोग। अपने नार्थ ब्लाक दफ्तर च अमले, जन शकैतें ते पेंशन सरबंधी मंत्रालय दे केन्द्री राज्यमंत्री दे तौर पर कम्मकाज संभालदे होई उनें आखेआ जे एनडीए सरकार दे त्रिये कार्यकाल च प्रधानमंत्री नरेन्द्र मोदी हुंदी अगुवाई च पिछले 10एं बरें थमां कीते जा करदे कम्म जारी रौहगन।

<><><><><><>

Ministers Charge

शिवराज चौहान होरें अज्ज राई—बाई ते करसानें उर भलाई बेहतरी सरबंधी मंत्री दे तौर पर कार्यभार संभाली लैता ऐ। श्री चौहान होरें औहदा संभालने मगरा आखेआ जे प्रधानमंत्री होरें करसानें दी आमदन गी दुगना करने दा धेइया कीते दा ऐ ते सरकार एहदे पर लगातार कम्म करा करदी ऐ। उनें आखेआ जे मंत्रालय हुन होर तेजी कन्नै कम्म करोग ते करसानें दी भलाई बेहतरी लेई हर मुमकिन गैह पुट्टी जाग। श्री चौहान होरें एह बी आखेआ जे ओह अधिकारिणें गी आपूं संकल्प पत्र सौंपगन। हरदीप सिंह पूरी होरें पैट्रोलियम ते कुदरती गैस ते गजेन्द्र सिंह शेखावत होरें संस्कृति मंत्रालय संभाली लैता ऐ। गजेन्द्र सिंह शेखावत होरें इस मौके पर बोलदे होई आखेआ जे बक्ख—बक्ख मंचें ते पैहलुएं राएं मंत्रालय नै भारत दी इक टकोहदी तस्वीर तैआर कीती ऐ। उनें आखेआ जे संस्कृति ते

सैलसफा मंत्रालय नै मिशन विकसित भारत च जोगदान देने दा धेइया कीते दा ऐ। जितन राम मांझी होरें लौहके, भलेया लौहके ते दरमेयाने उद्यमें सरबंधी मंत्री दे रूपै च कम्मकाज संभाली लैता ऐ। उनें आखेआ जे ओह् इस बचार पर भरोसा करदे न जे कम्म पूजा ऐ ते कोई बी कम्म लौहका जां बड्डा नेई होंदा। अर्जुन राम मेघववाल होरें कनून ते न्यां मंत्रालय च राज्य मंत्री, स्वतंत्र प्रभार दे तौर पर कम्मकाज संभालेआ। उनें आखेआ जे बकाया पेदे मामलें दा नबेड़ा करना उंदे मंत्रालय दी प्राथमिकता होग। किरेंन रिजिजू होरें संसदीय मामले ते अल्पसंख्यक मंत्रालय चे मंत्री दे तौर पर कार्यभार संभाली लैती। मनोहर लाल होरें ऊर्जा मंत्री दे रूपै च जिम्मेदारी संभाली। जयंत चौधरी होरें भारत दे विकास ते उपक्रम सरबंधी मंत्रालय च राज्यमंत्री दे तौर पर कम्मकाज संभालेआ। संजय सेठ होरें रक्षा राज्यमंत्री दे तौर पर औहदा संभालेआ।

<><><><><><>

Scindia Charge

ज्योतिसदित्य सिंधिया होरें अज्ज संचार मंत्री दे तौर पर जिम्मेवारी संभाली लैती ऐ। कार्यभार संभालने मगरा पत्रकारें कन्नै गल्लबात करदे होई श्री सिंधिया होरें आखेआ जे प्रधानमंत्री नरेन्द्र मोदी हुंदी अगुवाई च संचार मंत्रालय च क्रांति आई ऐ। उनें आखेआ जे ओह् भारत दे 140 करोड़ लोकें ते प्रधानमंत्री नरेन्द्र मोदी हुंदी आसैं तांगे मताबक कम्म करने दी अपने आस्सेआ पूरी कोशश करगंन। तोआई जे.पी.नड्डा होरें सेहत ते परिवार कल्याण सरबंधी मंत्री दे तौर पर जिम्मेवारी संभाली लैती ऐ। अनुप्रिया पटेल ते जाधव प्रतापराव जेहड़े दवै इस मंत्रालय च राज्यमंत्री न, इस मौके पर मजूद हे।

<><><><><><>

Jittin Prasad IT

इलैक्ट्रानिक्स ते सूचना टैक्नालोजी मंत्रालय च नमें नियुक्त होए दे राज्यमंत्री जितन प्रसाद होरें अज्ज आखेआ ऐ जे सूचना टैक्नालोजी सरबंधी उद्योग च

पिछले 10एं ब'रें च जबरदस्त तरक्की ते बदलाव होआ ऐ ते सरकार नै भारत गी सूचना टैक्नालोजी दा कुल संसारी केन्द्र बनाने दा धेइया कीते दा ऐ। अपने मंत्रालय च औहदा संभालदे होई श्री प्रसाद होरें आखेआ जे मजूदा समें च इलैक्ट्रानिक्स ते सूचना टैक्नालोजी सरबंधी क्षेत्र खास करियै नोजवानें च समर्थ कायम करने आला इक महत्वै आला सरिस्ता ऐ।

<><><><><><>

PM-Pak

प्रधानमंत्री नरेन्द्र मोदी होरें आखेआ ऐ जे भारत दे लोक सदा चुनां गै रमानदारी, सुरक्षा ते तरक्की दी बत्तै पर अगड़े बधने दे हिमायती रेह न। पाकिस्तान दे साबका प्रधानमंत्री ते पाकिस्तान मुस्लिम लीग नवाज गुट दे अध्यक्ष नवाज शरीफ हुंदी इक सोशल मीडिया पोस्ट दे परते च उनें एह गल्ल आख्खी। नवाज शरीफ होरें त्रीह बारी प्रधानमंत्री बनने पर मोदी होरें गी शुभकामना दित्तियां हियां जेह्दे परते च मोदी होरें आखेआ जे लोकें दे खुशहाली ते सुरक्षा च बाद्धा करना म्हेशां उंदी पैहली तरजीह रौहग। शरीफ होरें आखेआ हा जे हाल दे चुनां च बीजेपी दी कामयाबी कन्नै मोदी हुंदे नेतृत्व च लोकें दे विश्वास दा अक्स लब्बदा ऐ। पाकिस्तान दे प्रधानमंत्री शहबाज शरीफ होरें बी भारत दे प्रधानमंत्री दे रूपै च सगंध चुक्कने पर मोदी होरें गी बधाई दित्ती। मोदी होरें उनेंगी बी शुभकामनाएं लेई धन्नबाद कीता।

<><><><><><>

PM-India Qatar

प्रधानमंत्री नरेन्द्र मोदी होरें आखेआ जे भारत ते कतर अपने दपक्खी सरबंधें गी उंचाइएं पर केई जाने आस्तै वचनबद्ध ऐ। कतर दे अमीर शेख तमीम बिन हमाद अल थानी हुंदे कन्नै गल्लबात मगरा मोदी होरें सोशल मीडिया पर एह गल्ल

आकखी। उनें अल थानी हुंदे आस्सेआ दित्ती गेदी बधाई पर बी आभार जाहर कीता।

<><><><><><>

PM-Yoga Day

मुख्य भरै च 21 जून गी मनाए जाने आले 10में अंतर्राष्ट्रीय योग दिवस गी लेइयै बड़ा उत्साह ऐ। इस सरबंघै च प्रधानमंत्री नरेन्द्र मोदी होरें इक सोशल मीडिया पोस्ट च आखेआ जे योग इक शाश्वत अभ्यास ऐ जेहड़ा एकता ते सद्भाव दी प्रेरणा दिंदा ऐ। उनें बक्ख-बक्ख संस्कृतिएं ते क्षेत्रें गी जोड़ने दी टकोहदी क्षमता पर लोह पाई ते आखेआ जे योग नै समग्र कल्याण दी खोज च दुनिया भरै च लक्खां बद्धे लोकें गी इक जुट कीतार ऐ। उनें आखेआ जे हर कुसै गी योग गी अपने जीवन दा अनट्रुट हिस्सा बनाने लेई वचनबद्ध होना लोड़चदा ते दुएं गी बी इसी अपने जीवन दा हिस्सा बनाने आस्तै प्रोत्साहित करना लोड़चदा। उनें आखेआ जे योग शांति ते संयम कन्नै जीवन दी चुनौतिएं कन्नै निबड़ने च सक्षम बनांदा ऐ। उनें योग सरबंघी किश वीडियो सोशल मीडिया पर सांझा कीते। हर ब'रे 21 जून गी अंतर्राष्ट्रीय योग दिवस मनाया जंदा ऐ।

<><><><><><>

Odisha

बीजेपी दे वरिष्ठ लीडर क्योनझार थमां 4 बारी विधायक चुने गेदे 52एं ब'रें दे मोहन चरण माझी ओडिशा दे नमें मुख्यमंत्री होंगन। ओडिशा च बीजेपी नै अपने विधायक दल दा नेता चुनने लेई अज्ज भुवनेश्वर च इक बैठक लाई जेहदे नै राज्य दे नमें मुख्यमंत्री दी नियुक्ति लेई फैसला लैता गेआ। नमें मुख्यमंत्री ते मंत्री परिषद गी कल बुधवारें संजा भुवनेश्वर दे जनता मैदान च सगंध चुकाई जाग। अज्जै दी बैठका च नमें मुख्यमंत्री दे नां पर फैसला लैने दी प्रक्रिया लेई केन्द्री निगरान नियुक्त कीते गेदे केन्द्री मंत्री राजनाथ सिंह ते भूपेन्द्र यादव होरें बीजेपी दे विधायकें कन्नै चर्चा कीती ते मुख्यमंत्री दे नां पर आम सैहमति बनी

गेई। बीजेपी नै राज्य लेई 2 उपमुख्यमंत्री बनाने दा बी फैसला लैता ऐ जिंदे च कनकवर्धन सिंह देव ते पार्वती परिदा शामिल न।

<><><><><><>

Akhilesh Karhal

उत्तर प्रदेश दे साबका मुख्यमंत्री ते समाजवादी पार्टी दे अध्यक्ष अखिलेश यादव मैनपुरी दी करहल विधानसभा सीट परा स्तीफा देंगन ते हुन सांसद दे रूपै च अपनिएं जिम्मेदारिएं पर ध्यान देंगन। ओह हाल च गै कनौज सीट परा लोकसभा दे मिंबर चुने गे न। तोआई उत्तर प्रदेश दे लोक निर्माण मंत्री जितिन प्रसाद होरें अज्ज उत्तर प्रदेश विधानमंडल दी मिंबरी थमां स्तीफा देई दित्ता ऐ। उनें ऐतवारें केन्द्र च मंत्री दे तौर पर सगंध चुक्की ही।

<><><><><><>

MP-CM

मध्यप्रदेश च डॉ. मोहन यादव हुंदी सरकार दे कल 6 महीने पूरे होई जांगन। मजूदा सरकार नै पिछले ब'रे 13 दिसम्बर गी सत्ता सांभी ही। इस मौके पर मुख्यमंत्री होर अज्ज अपनी सरकार दियां उपलब्धियां गिनांदे होई संवाददाताएं गी आखेआ जे हुन कोला अग्रे राज्य च कोई बी सैल्ला रूक्ख नेई बड़्डेआ जाग। डॉ. यादव होरें दस्सेआ जे 13 जून थमां मध्यप्रदेश पर्यटन बोर्ड दी पीएम श्री हवाई थमां बी शुरू कीती जा'रदी ऐ ते 16 जून कोला उज्जैन-ओकारेश्वर-इंदौर-भोपाल बश्कार पीएम श्री धार्मिक सैलसफा हेली सेवा बी शुरू होग। उनें दस्सेआ जे राज्य च सब्बै मूर्तिया पत्थर कन्नै तैआर कीतियां जांगन ते उंदा निर्माण राज्य दे कारीगिरें मूर्तिकारें दे सैहयोग कन्नै कीता जाग।

<><><><><><>

Sikkim-Speaker

सिक्किम च संजीत खरेल होरें गी राज्य विधासभा दा कार्यवाहक अध्यक्ष नियुक्त कीता गेआ ऐ। राज्यपाल लक्ष्मण प्रसाद आचार्य होरें अज्ज गगंटोक राजभवन च उनेंगी औहदे दे सगंध सगंध चुकाई। खरेल होरें सिक्किम दी 11मीं विधासभा दे उद्घाटन सत्र दी अध्यक्षता करगंन। विधानसभा च ओह नामचांग रेटेपानी निर्वाचन हल्के दी नुमायंदगी करा करदे न। विधानसभा च नमें चुनोए दे सदस्ये दे शपथ ग्रहण समारोह च मुख्यमंत्री प्रेम सिंह तमांग ते मुख्य सचिव हुंदे समेत केई होर नामवर लोक मजूद हे।

<><><><><><>

SC-NEET

सुप्रीम कोर्ट नै अज्ज नीट अंडरग्रेजुएट 2024 ब'रे आले मतेयान मगरा मैडिकल प्रोग्रामें च दाखले सरबंधी कौंसलिंग प्रक्रिया पर रोक लाने थमां इंकार करी दित्ता ऐ। अदालत नै 5 मई गी होए दे नीट दे मतेयान गी रद्द करने आली याचिका पर राश्ट्री मतेयान अर्जेसी एनटीए ते होरने थमां जवाब मंगेआ ऐ। इस मामले गी इक होर बकाया याचिका कन्नै जोड़ियै हुन 8 जुलाई गी सुनवाई होग। मतेयान च गड़बड़ी ते धोखाधड़ी दे जांच कराने दी मंग गी लेइयै विद्यार्थिएं याचिका दायर कीती ही। एहदे च मतेयानें दे नतीजे गी वापस लैने ते नमें सिरैआ मतेयान कराने दी मंग कीती गेदी ऐ।

<><><><><><>

UGC

विश्वविद्यालय अनुदान आयोग यूजीसी नै उच्च शिक्षण संस्थानें गी अगले माली ब'रे थमां साल च छात्रें गी दो बारी प्रवेश देने दी इजाजत देने दा फैसला लैता ऐ। इसलै यूजीसी इक ब'रे च इक शैक्षणिक सत्र च प्रवेश दी इजाजत दिंदा ऐ। यूजीसी दे अध्यक्ष प्रो. एम.जगदीश कुमार होरें आखेआ जे एहदे कन्नै उनें बच्चें

गी मता फायदा थ्होग जिंदे बोर्ड दे नतीजे दी घोषणा च चिर होई जंदा ऐ जां
फही जेहड़े निजी कारणें करी दाखले थमां रेई जंदे न।

<><><><><><>

Malavi

मलावी दे उपराष्ट्रपति सौलोस चिलिमा ते 9 होर लोकें गी लेइयै जा'रदा इक
जहाज जेहड़ा लापता होई गेआ हा, ओहदे च सुआर सब्बने दी मौत दी तस्दीक
करी दित्ती गेई ऐ। मलावी दे राष्ट्रपति हुंदे दफतरे दे ब्यान मूजब मलावी रक्षा
बल दे जहाज दा संपर्क राजधानी लिलोंग्वे थमां रवाना दे बाद त्रुट्टी गेआ हा,
जहाज च 51 ब'रे दे उपराष्ट्रपति हुंदी घरै आली ते 8 होर लोक सुआर हे। एह
जहाज राजधानी लिलोंग्वे थमां रवाना होआ पर लगभग 45 मिंटे मगरा मजुगू
अंतर्राष्ट्रीय हवाई अड्डे पर अपनी तैह लैंडिंग च विफल रेआ। तुपाई अभियान नै
जहाज दा मलबा बरामद करी लैता ऐ।

<><><><><><>

New Tax Devolution

केंद्र नै राज्यें गी जून महीने लेई इक्क लक्ख 39 ज्हार करोड़ रुपें कोला मती टैक्सें
सरबंधी रकम जारी करी दित्ती ऐ। खजाना मंत्रालय नै आखेआ ऐ जे एह रकम
राज्य सरकारें गी विकास ते रास-पूंजी सरबंधी खर्चे च तेजी आनने च समर्थ
बनाग। उत्तर प्रदेश गी सब्बने कोला मते 25 ज्हार करोड़ रुपे दित्ते गेन। बिहार
गी 14 ज्हार करोड़ कोला मती रकम, मध्य प्रदेश गी तकरीबन 11 ज्हार करोड़
रुपे ते पच्छिम बंगाल गी 10 ज्हार 500 करोड़ रुपेआ दित्ता गेआ ऐ। इस किश्त दे
कन्नै गै केंद्र नै 10 जून 2024 तोड़ी राज्यें गी 2 लक्ख 79 ज्हार करोड़ कोला
मती रकम जारी करी दित्ती ऐ।

<><><><><><>

IMD

मौसम विभाग नै अगले 3 शा 4 दिनें आस्तै उत्तर प्रदेश, हरियाणा ते दिल्ली सनें पूर्वी ते उत्तर-पच्छम भारत दे किश हिस्सें च बड़ी मती गर्मी सरबन्धी ओरेंज अलर्ट जारी कीता ऐ। आकाशवाणी कन्ने गल्ल करदे होई मौसम विभाग दे वरिष्ठ सांईसदान डॉ. आर.के.जेनामणि होरें आखेआ जे बड़ी मती गर्मी परतियै शुरू होई गेई ऐ ते एह मुख तौर पर उत्तर प्रदेश ते दिल्ली च जारी रौहग। उनें आखेआ जे तापमान 43 थमां 45 डिग्री सैल्सियस बश्कार रौहने दी संभावना ऐ। तांई जम्मू कश्मीर च बी गर्मी ते खुश्क मौसम बने दा रौहग। जम्मू दे मैदानी इलाके च लूह चली सकदी ऐ। मौसम विभाग दा गलाना ऐ जे 17 जून तगर मौसम आम तौर पर खुश्क बने दा रौहग। उआं टामी-टामी थाहरें पर हल्की बरखा पेई सकदी ऐ।

<><><><><><>

